



FLorianus tribunus militum Christianus in superiori Austria fuit, ubi cum quadraginta militibus pijs in oppido Cecia (quod hodie Zeyfelmaur dicitur) habitabat. is autē locus pertinebat ad Laureacensem Ecclesiam. Cum autem is intellexisset Aquilam Diocletiani Cæsaris (sub quo maxima Christianorum persecutio fuit) præfectū undiq; Christianos disquirere qui nollent idolis immolare, & crucifixum abnegare (querentibus nimirum Christicolis latebras & speluncas quibus abderentur) hic uir fortis & Christi athleta ad suos conuersus, inquit: Commilitones charissimi, turpe est nobis sic segnes in tanta piorum fratrum

laniena torpescere, & fidem abscondere. quin imus sæuis istis cruciatibus obuiam, tyranni enim huiusmodi corpus tantum occidere, uerum animæ nihil officere possunt, quantumuis truces & sanguinolenti, cruorisq; Christiani sint infatiabiles. Hæc cum fortes athlete audiissent, dicto citius cum suo tribuno festinabundi Laureacū contendunt, atq; præfecto Aquilæ in ponte, per quem Anasus fluius labitur, intrepidè occurrunt, & quid uenerint minimè hæsitantes liberè profitentur. Attonitus præfectus animositate militum, carceribus occludi iussit, & custodibus muniri.